

**Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr. xx ulloq xx. xxx 2017-imeersoq**  
(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

## Saqqummiussissut

### Siullermeerneqarnera

Siunnersuutip pingaarnertut siunertaraa meeqqat atuarfiat pillugu inatsisip (atuarfik pillugu inatsit) pisariaqartitanut paasineqarsimasunut naleqqussarnissaa.

Siunnersuut suliarineqarpoq atuarfik pillugu inatsit atuuttoq kiisalu allaffissornikkut aalajangersakkat inatsimmut attuumasut oqallisiginiarlugit novembarip aappaani aamma pingajuani 2016-imi workshopeqarsimaneq tunuliaqutaralugu. Oqaloqatigiinnerni eqqartorneqarput maleruagassanut maanna atuuttunut kissaatit allannguutissatullu siunnersuutit.

Workshopeqarnek kommuninit sisamaasunit, KANUKOKA-mit, IMAK-imit, Aningaasaqarnermut Akileraartarnermullu Naalakkersuisoqarfimmit kiisalu Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmit peqataaffigineqarpoq.

Workshopeqarnermut atatillugu meeqqat atuarfiata aaqqissuuteqqinneqarsinnaanera aamma eqqartorneqarpoq. Tassunga atatillugu paasineqarpoq aaqqissueqqinniarluni suliniuteqarnissaq piffissamik sivilisinerusumik atuffiusariaqassasoq. Ilutigitilluguli nalilerneqarpoq pissusissamisuussasoq, allanngortissallugit kissaatigineqartut aaqqissueqqinnissami ilanngunneqartariaqanngitsut pissutsillu atuuttut peqqutigalugit iluarsiuminarnerusutut isigineqartut UKA 2017-imi saqqummiunneqarsinnaariissasut.

Allannguutissatut siunnersuutigineqartut allannguutaapput piaartumik aaqqikkusunneqartut meeqqallu atuarfiata inatsisaanik aaqqissueqqinnissamut utaqqissunneqartariaqanngitsut. Taassuma saniatigut allannguutit pineqartut workshopeqarnermi isumaqatigiissutigineqarsimapput.

Allannguutit siullertut atuartut ineqarfiinut najugaqarfiinullu minnerpaaffissaliinissamut inatsisitigut periarfissiissapput. Tamanna tunngavigalugu kingorna minnerpaaffissat taamatut ittit pillugit nalunaarusiortoqassaaq.

Taassuma saniatigut ”oqaluttuarisaaneq” inuiaqatigiilerinermi atuartitsissutitut immikkoortutut avissaartinneqassaaq. Taamaaliornikkut oqaluttuarisaanermi atuartitsineq pitsanngorsarniarneqarpoq.

Taassuma saniatigut atuartitsissutit ”sumiiffinni toqqagassat” iluaniittut qitiusumik anguniagalersorlugit ikinnerusunut immikkoortiterneqassapput atuartitsissutillu taakkua pinngitsoorani atuartitsissutigineqartussanngortinneqassapput. Allannguinerup tamassuma siunertaraa atuartitsissutit mernguernartut (atuartitsissutit assassornermik sammisaqarfiusut aamma pinngorartitsiviusut) nukittorsarneqarnissaat.

Siunnersuummi aamma aalajangersakkamik ilanngussisoqarpoq atuartoq - meeqqap ineriartortorneranut innimigisariallit pingaarutillit peqquataappata ukiumik atuarfiusumik naammassereersimasaminik uteqqiisinnaasoq. Assinganik ukiumik alluisinnaaneq aamma periarfissaavoq.

Kiisalu siunnersuummut ilaavoq sunniutinik uuttuisarneq pillugu aalajangersakkani misissorneqartussanik taaguinerup peerneqarnissaa. Taarsiullugu sunniutinik uuttuisarnermut pisussaaffik, ilisimasanik eqiterisarneq siammarterisarneq pillugit aalajangersakkanut ilanngunneqarpoq. Allanguinermi ersarissarneqarportaaq sunniutinik uuttuisarneq meeqqat atuarfianut taamaallaat tunngatinneqassasoq.

Taamatut oqaaseqarnikkut siunnersuut Inatsisartunut akuersortumik oqallisissannagortinneqarpoq.